

Inatsisissatut siunnersuummut oqaaseqaatit

Oqaaseqaatit nalinginnaasut**1. Inatsisissatut siunnersuutip tunngavia**

Umiarsuit takornarianik angallassissutit usitussuseq aallaavigalugu umiarsualivimmiinnermut akileraarutaat ilaasunut akileraarutinngorlugu Inatsisartut 2002-mi upernaakkut ataatsimiinnerminni aalajangerpaat, tassa 1. januar 2003 aallarnerfigalugu akilernerqartussaalluni umiarsuarni takornarianik angallassisuni Kalaallit Nunaanni umiarsualivinnut nunalittuni, umiarsualiviup avataani kisartuni imaluunniit ilaasunik sinerissamut nunnigussisuni ilaasunut akileraarut ilaasumut ataatsimut 300 kr.-iusoq.

Akileraarummik taamanikkut allannguinerup siunertaraa umiarsuarnut takornarianik angallassissutitut ilaallutik takornariat amerlanerulersinnissaat akileraarummillu akiliisitsisarnerup pisiinnerulernissaa, tassami umiarsuarni takornarianik angallassissummi ilaasumut ataatsimut akileraarut taannaaginnassammat, umiarsuup takornarianik angallassissutit angallassinermi umiarsualivik ataaseq arlaqartulluunniit nunaliffiginerai apeqqutaatinnagu. Ilaasumut ataatsimut akileraarut 2006-imi 300 kr.-iniit 450 kr.-inut qaffanneqarpoq. Qaffaaneq 1. april 2006-imiit atuutilerpoq.

Umiarsuarnut takornarianik angallassissutitut ilaallutik takornariat 2005-imiit 2007-ip tunngaanut amerliartorsimapput. Umiarsuarnut takornarianik angallassissutitut ilaallutik takornariat 2005-imi 16.447-pput, 2006-imi 22.051-iullutik 2007-imilu 23.904-llutik. Inatsisartut 2008-mi ukiakkut ataatsimiinnerminni umiarsuarni takornarianik angallassisuni ilaasut akileraarutaat ilaasumut ataatsimut 450 kr.-iniit 525 kr.-inut qaffappaat.

Umiarsuarnut takornarianik angallassissutitut ilaallutik takornariat 2008-mi 28.891-imiit 2009-mi 26.976-inut ikileriarput. 2010-mi ilaasut 30.000-inut amerleriarput. Umiarsuarnut takornarianik angallassissutitut ilaallutik takornariat 2010-miit ikiliartorput, 2013-imilu umiarsuarnut takornarianik angallassissutitut ilaallutik takornariat nalunaarsorneqartut 21.496-iupput, tassa ilaasut 2010-miit 8.504-nik ikileriarlutik.

Umiarsuarnut takornarianik angallassissutitut ilaallutik takornariat ikiliartornerisa kinguneeraat Landskarsip umiarsuarni takornarianik angallassisuni ilaasut akileraarutaasigut 2013-imi isertitaasa 2010-mut sanilliullugit 4,5 mio. kr.-inik apparsimanerat. Umiarsuarnut takornarianik angallassissutitut ilaalluni takornariarfigineqartartut allat, soorlu Island aamma Svalbard (Norge) piffissami 2010-miit 2013-imut umiarsuarnut takornarianik angallassissutitut ilaallutik takornarianit amerliartuinnartunit tikinneqartarput.

Inuussutissarsiornermut, Aatsitassaqarmut Suliffeqarnermullu Naalakkersuisoqarfik umiarsuarnut takornarianik angallassissutinut ilaallutik takornariartartut pillugit misissuisimavoq, misissuinerullu takutippaa umiarsuit takornarianik angallassissutit Kalaallit Nunaanni umiarsualivinnut ikittuinnarnut nunalittarlutik ilaasunik angallassineranni akileraarut qaffasippallaartoq, tassa umiarsuarnut takornarianik angallassissutinut ilaalluni takornariarfingeqartartunut allanut, soorlu Islandimut aamma Svalbardimut sanilliullugu.

Islandip Svalbardillu (Norge) umiarsualivimmiinnermut akileraarutit umiarsuit angissusii tungavigalugit atugaraat. Misissuinerup takutippaa umiarsuup takornarianik angallassissutip angisuup 2.500-nik ilaasoqartup Islandimi umiarsualivimmut ataatsimut nunalinnerani umiarsualivimmiinnermut akileraarutissai, umiarsuup taassuma Kalaallit Nunaanni umiarsualivimmut ataasiinnarmut nunalissagaluaruni umiarsuarni takornarianik angallassisuni ilaasut akileraarutaattut akiligassaralunit 1,2 mio. kr.-inik appasinnerussasut.

Assersuummi tassani Islandimi umiarsualivimmiinnermut akileraarut, umiarsuup takornarianik angallassissutip angisuup Islandimi umiarsualivimmut ataatsimut nunalinnermini ilaasumut ataatsimut 28 kr.-inik akiliinissaatut naleqarpoq. Norgemi akileraarut umiarsuup takornarianik angallassissutip 2.500-nik ilaasoqartup Svalbardimi umiarsualivimmut ataatsimut nunalinnermini, umiarsuarni takornarianik angallassisuni ilaasut akileraarutaannut ilaasumut ataatsimut 160 kr.-inik akiliinissaatut naleqarpoq.

Islandimi, Svalbardimi Kalaallillu Nunaanni ilaasut amerlassusiisa allanngoriartorerisa ersersippaat, nunatsinni ilaasunut akileraarut ilaasumut ataatsimut 525 kr.-iusoq Kalaallit Nunaata umiarsuarnut takornarianik angallassissutinut ilaalluni takornariarfiusartunut allanut, umiarsuarnut takornariartaatinut tunngatillugu appasinnerusunik akileraaruteqartitsisunut, unammillersinnaassusianut ajoqutaasoq. Siunnersuutip siunertaraa umiarsuarni takornarianik angallassisuni ilaasut akileraarutaannik appaanissaq, taamaaliornikkut unammillersinnaassuseq pitsanngorsarniarlugu aammalu umiarsuarnut takornarianik angallassissutinut ilaallutik takornariat Kalaallit Nunaannut tikittartut ukiuni aggersuni amerlisinniarlugit. Tamatumunnga atatillugu immikkorluinnaq pingaaruteqartoq tassaavoq umiarsuit anginerit amerliartuinnartut, Kalaallit Nunaat nunaliffiginagu avaqqutsiinnartartut maanga tikinnissamut pilerilersinneqarnissaat.

Umiarsuit takornarianik angallassisut minnerit, umiarsualivinnut arlaqartunut nunalikkajuttut Kalaallit Nunaata ilaasut akileraarutaannik maanna atuuttumik peqarnera pissutigalugu nunarput, ilaasunik imarpimmi angallassinissaminnit orniginannginnerutissappassuk tamanna tupinnangilaq. Umiarsuarmut 276-inik ilaasoqartumut Qeqertarsuup Tunuani nalinginnaasumik angallaviusartumi sap.ak. ataatsimik sivilissuseqartumik angallassisumut akileraarut maanna atuuttoq malillugu isertinneqartussat tamarmiusut 145.000 kr.-iupput, angalaneq taamaaqataa Islandimi akileraarutit angissusii naapertorlugit 61.000 kr.-inik akileraarfiususaaq.

Nunatsinni akileraarutip maannakkut qaffasissusia angalanernut taamaattunut Islandimi taamaaqataannut sanilliullugu 138 %-imik qaffasinneruvoq.

Ilutigitillugu siunnersuutaavoq umiarsuarni takornarianik angallassisuni ilaasut akileraarutaat umiarsualivimmiinnermut akileraarutinnngortinneqassasoq, umiarsuup usitussusia (BT/BRT) aallaavigalugu naatsorsorneqartussamik. Taamaalilluni umiarsualivimmiinnermut akileraarut usitussuseq aallaavigalugu umiarsualivimmut nunalinnerit tamaasa BRT-imut ataatsimut nal.ak. 24-t aallartinneri tamaasa 1,10 kr.-iusoq akilersinneqartassaaq. Akileraarut taamatut allanguinikkut Islandimi Svalbardimilu akileraarutitut sanilliukkuminarnerulissaaq. Akitsuut akilerneqassaaq, umiarsuaq pineqartoq umiarsualivimmut nunalinnerisoq umiarsualiviulluunniit avataanut kisaqqanersoq apeqqutaatinnagit.

Takornarianik angallassisutitnik umiarsuaatileqatigiiffiit ilaasumik amerlassusiinik nalunaarutiginnittarnertik ingerlatiinnassavaat, ilaasut inuiaassusiat naapertorlugu agguataarlugit.

Siunnersuummi aamma pineqarpoq ilaasut angalanernut Danmarkimiit, Savalimmiuniit nunanilluunniit allaniit aaqqissuunneqartunut billetsimik ataatsimoortumik pisisimasut akileraarutaannik atorunnaarsitsinissaaq (ilaasunik nalinginnaasunik takornarianillu angallassineq). Ilaasunik nalinginnaasunik takornarianillu angallassinikkut akileraarutitigut 2013-imi isertinneqartut 112.875 kr.-iupput.

Takornariat amerliartuinnartut timmisartumut billetsit aamma Kalaallit Nunaanni umiarsuutigut ilaasunik angallassinermut billetsit nammineerlutik internetikkut pisiarisarpaat. Taamaaliortoqartillugu umiarsuarni takornarianik angallassisuni ilaasut akileraarutaat akilersinneqarneq ajorpoq. Takornarialli timmisartumut umiarsuarmullu billetsit angalatitsivimmut tassungarpiaq saaffiginnillutik pisiarippatigik akileraarummik akiliisoqassaaq. Tassa imaappoq angalanissat assigeerluinnaat marluk akileraarutitigut assigiinngitsumik pineqartarput, apeqqutaatillugu takornariat angalatitsivimmik atuinersut atuinnginnersulluunniit. Tamanna naleqquttuusorinanngilaq.

Tassungattaq ilaavoq, angalatitsiviit nunanit allaneersut akileraarummik maleruagassat atuutut naapertorlugit akiliisitsisarnersut akiliisitsisarunillu ingerlatitseqqittarnersut nakkutigumi-naalluinnartuusoq paasineqarmat. Tassungaa pissutaavoq, ilaasut nunanit allaneersut ilaat kikkut angalanernut Danmarkimiit, Savalimmiuniit nunanilluunniit allaniit aaqqissuunneqartunut billetsimik ataatsimoortumik pisisimarnersut, allallu kikkut taamaalorsimannnginnersut erseqqissumik paasineqarsinnaanngimmat. Taamaammat akileraaruseriffiup angallassisulluunniit periarfissaqanngillat misissussallugu maleruagassanik malinninneruneq amerlanerusunik isertitsissutaassagaluarnersoq.

2. Inatsisissatut siunnersuutip imarisai

Inatsisissatut siunnersuutip kingunerissavaa umiarsuarni takornarianik angallassisuni ilaasut akileraarutaata maanna atuuttup 1. januar 2015 allarnerfigalugu atorunnaarsinneqarnissaa. Umiarsuarni takornarianik angallassisuni ilaasut akileraarutaat umiarsualivimmiinnermut akileraarutinnngortinneqassaaq, umiarsuup usitussusia (BT/BRT) aallaavigalugu naatsorsorneqartussamik. Taamaaliornikkut Nunatsinni akileraaruseeriaaseq Svalbardimi Islandimilu akileraaruseeriaatsinut naleqqussarneqassaaq. Allanguinerup kingunerissavaa umiarsuit takornarianik angallassisut Kalaallit Nunaanni umiarsualivimmut nunalinnerini tamani umiarsualivimmiinnermut akileraarutip akilerneqartarnissaa, akileraarutillu ilaasumut ataatsimut naatsorsorlugu qaffasissusiata malunnaatilimmik appartinneqarnissaa.

Aammattaaq ilaasut angalanernut Danmarkimiit, Savalimmiuniit nunanilluunniit allanit aallaaveqartunut, ilaasunik nalinginnaasunik takornarianillu peqataaffigineqartunut ilaasut akileraarutaat atorunnaarsinneqarpoq.

Siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Siunnersuut</i>
	§ 1 Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaanni nr. 20, 30. oktober 1992-meersumi, ilaatigut Inatsisartut inatsisaatigut nr. 2, 21. maj 2002-meersukkut kingullermillu Inatsisartut inatsisaatigut nr. 8, 5. december 2008-meersukkut allannngortinneqartumi makku allannguutigittinneqarput:
Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaat	1. Inatsit ima taaguuteqarpoq: ”Umiarsualivimmiinnermut akileraarutit pillugit Inatsisartut inatsisaat”

<p>§ 1. <i>Imm. 2.</i> Umiarsuit ilaasunik angallassissutit, ilaasunik nalinginnaasunik takornarianillu angallassillutik ingerlaartut akileraarummik imm. 1-imi pineqartumik akiliissanngillat. Akerlianilli akilerneqassaaq angalanernut Danmarkimiit, Savalimmiuniit nunanilluunniit allaniit aaqqissuunneqartunut billetsimik pisisimasunut akileraarut tamarmiusoq ilaasumut ataatsimut 525 kr.-iusoq. <i>Imm. 3.</i> Umiarsuit takornarianik angallassissutit Kalaallit Nunaanni umiarsualivinnut nunalittut, umiarsualiviup avataani kisartut imaluunniit ilaasunik sinerissamut nunnigussisut imm. 1 naapertorlugu akileraarutininik akiliissanngillat. Tassunga taarsiullugu umiarsuup takornarianik angallassinermi ilaasuinut akileraarut tamarmiusoq ilaasumut ataatsimut 525 kr.-niusooq akilerneqartassaaq. Umiarsuup takornarianik angallassinissani Kalaallit Nunaanni umiarsualivimmiit aallarnerpagu, umiarsuup aallarnerani ilaasorineqartumut ataatsimut akileraarut tamarmiusoq 525 kr.-niusooq akilerneqartassaaq.</p>	<p>2. § 1-imi imm. 2-3 atorunnaarput. Imm. 4 matuma kingorna tassaalerpoq imm. 2.</p>
<p>§ 1. <i>Imm.4.</i> Umiarsuup Kalaallit Nunaanni umiarsualivimmut, umiarsualiviup avataanut sinerissamiluunniit ilaasuminik nunnigussiffissamisut tikitassaanut siullermut apuunnissaa nal.ak. 24-nik sioqqullugu umiarsuup takornarianik angallassissutip naalagaata allattorsimaffik ilaasut qanoq amerlatiginerannik imaqartooq Akileraartarnermi Pisortaqarfimmut nassiuutissavaa. Takornarianik angallassineq Kalaallit Nunaanni umiarsualivimmiit aallarnerneqarpat umiarsuaq aallartinnagu allattorsimaffik nassiuunneqassaaq.</p>	<p>3. § 1, imm. 4, imm. 2-nngortoq ima oqaasertaqarpoq: ” <i>Imm. 2.</i> Umiarsuup takornarianik angallassissutip Kalaallit Nunaanni umiarsualivimmut, umiarsualiviup avataanut sinerissamiluunniit ilaasuminik nunnigussiffissamisut tikitassaanut siullermut apuunnissaa nal.ak. 24-nik sioqqullugu, umiarsuup naalagaata allattorsimaffik ilaasut qanoq amerlatiginerannik pineqartullu qanoq inuiaassuseqarnerannik imaqartooq Akileraaruseriffimmut nassiuutissavaa. Takornarianik angallassineq Kalaallit Nunaanni umiarsualivimmiit aallarnerneqarpat</p>

	allattorsimaffik umiarsuaq aallartinnagu nassi- unneqassaaq.”
<p>§ 3, imm. 1. Akileraarut naatsorsorneqassaaq bruttoton- imut (BT) ataatsimut akit uku naapertorlugit: 1) Umiarsuit ilaasartaatit nal. ak. 24-t aallar- tinneri tamaasa 0 kr. 70 øre. 2) Angallatit aalisariutit Danmarkimi, Sava- limmiuni nunaniluunniit allani angerlarsi- maffeqartutut nalunaarsorneqarsimasut nal. ak. 24-t aallartinneri tamaasa 0 kr. 70 øre. 3) Umiarsuit nassiussanik angallassisartus- satut sananeqarsimasut kiisalu umiarsuit allat nal. ak. 24-t aallartinneri tamaasa 0 kr. 70 øre.</p>	<p>4. § 3, imm. 1-imi nr. 1-ip siornanut normutut nutaatut ilanngunneqarpoq: ”1) Umiarsuit takornarianik angallassisutit nal.ak. 24-t aallartinneri tamaasa 1 kr. 10 øre.” Nr. 1-3 matuma kingorna tassaalerput nr. 2-4.</p>
<p>§ 5. Akileraarutitut akiligassaq umiarsuup umiarsualivimmut nunalinnerani akiligassan- gussaaq. Umiarsuarnut takornarianik angal- lassissutitut ilaasunik nassataqartunut tun- ngatillugu akileraarutitut akiligassaq umiar- suup umiarsualivimmut nunalinnerani, umi- arsualiviup avataani kisarnerani imaluunniit sinerissami ilaasuminik nunnigussiffissaani akiligassanngussaaq. Takornarianik angallas- sineq aallartereersoq ilaasunik nutaanik Ka- laallit Nunaanni umiarsualivimmiit ilaasoqa- lerpat, akileraarutitut akiligassat amerlissu- taat umiarsuup umiarsualivimmut tassunga nunalinneraniit akiligassanngussaaq.</p>	<p>5. § 5, imm. 1-imi oqaaseqatigiit aappaat pi- ngajuilu peerneqarput.</p>
<p>§ 5. <i>Imm. 3.</i> Umiarsuit takornarianik angallas- sissutit akileraarutitut akiligassaat Akile- raartarnermi Pisortaqarfimmut kingusinner- paamik akilerneqassaaq umiarsuup umiar- sualivimmiit, umiarsualiviup avataani kisar- simaffimminiit imaluunniit sinerissami ilaa-</p>	<p>6. § 5-imi <i>imm. 3</i> atorunnaarpoq. Imm. 4 matuma kingorna tassaalerpoq imm. 3.</p>

suminik nunnigussiffigisaminiit aallalererani.	
<p>§ 5. <i>Imm. 4.</i> Umiarsuit umiarsualivimmut ataatsimut arlalinnulluunniit aalajangersimasumik nunalittartut imm. 2-mi aalajangersakkanit allaanerusumik akiliuteqarnissaat pillugu Akileraartarnermi Pisorta qarfimmik isumaqatigiissuteqartoqarsinnaavoq.</p>	<p>7. § 5, imm. 4-mi imm. 3-nngortumi peerneqarpoq ”matumani aamma umiarsuit ilaasartaatit § 1, imm. 2-mi taaneqartut”</p>
	<p style="text-align: center;">§ 2</p> <p>Inatsisartut inatsisaat 1. juni 2015-imi atuu-tilissaaq.</p>

3. Pisortanut aningaasatigut allaffissornikkullu sunniutissai

Umiarsuarni takornarianik angallassisuni ilaasut akileraarutaat maanna atuuttoq 2013-imi 11.285.400 kr.-inik isertitsissutaavoq. Aki maanna siunnersuutigineqartoq angallannermut taamaaqataanut 2.906.960,10 kr.-inik isertitsissutaassagaluarpoq. Tassa siunnersuutip isertitat 8.378.439,90 kr.-inik minnerunissaat kingunerissagaluarlugu.

Umiarsuarnullu takornarianik angallassissutinut ilaasut 2014-imi amerlassusissaat 2013-imi amerlassusiinit ikinnerussangatinneqarput, soorlu aamma akileraarummik allannguisoqanngikkaluartorluunniit angallanneq ukiuni aggersuni suli annikilliarussangatinneqartoq, taamaammatt isertitassatigut annaaneqartussat 8 mio. kr.-it missinginit taaneqartunit ikinnerussapput.

Umiarsuit ilaasunik angallassissutit atorlugit takornariaqarneq kinguariartortoq ilorraap tungaanut saatinneqassappat usitussuseq naapertorlugu akileraarummik unammillersinnaasumik atuilernissaaq pisariaqarpoq. Allannguinerup sunniutissai imaattussatut nalilerneqarput:

- 2015: Ilaasut 2013-imi kisitsimmut sanilliullugit 400-nik amerlissangatinneqarput
- 2016: Ilaasut 2013-imi kisitsimmut sanilliullugit 1.000-inik amerlissangatinneqarput
- 2017: Ilaasut 2013-imi kisitsimmut sanilliullugit 4.000-inik amerlissangatinneqarput
- 2018: Ilaasut 2013-imi kisitsimmut sanilliullugit 7.000-inik amerlissangatinneqarput
- 2020: Ilaasut 2013-imi kisitsimmut sanilliullugit 10.000-inik amerlissangatinneqarput
- 2030: Ilaasut 2013-imi kisitsimmut sanilliullugit 20.000-inik amerlissangatinneqarput

Umiarsuarni takornarianik angallassissutini ilaasut amerlissutissaasut nalilerneqartut isertitasatigit sunniutissaat tabelimi ataani allassimapput.

Ukioq	Amerlassusii	Isertitassat
2015	21.896	2.905.903
2016	22.496	2.985.532
2017	25.496	3.383.674
2018	28.496	3.781.815
2020	31.496	4.179.957
2030	41.496	5.507.096

Allaffissorneq eqqarsaatigalugu akileraaruseriffiup naatsorsuutigaa suliassaq maannakkut periarfissiissutaasut iluanni isumagisinnaassallugu.

4. Inuussutissarsiutinik ingerlataqartunut aningaasatigit allaffissornikkullu sunniutissai

Umiarsuarni takornarianik angallassissutini ilaasut akileraarutaannik atorunnaarsitsinerup umiarsuit, angallassinert ilaasullu amerlinerannik kinguneqarnissaa naatsorsuutigineqarpoq. Amerlinissaat taanna nunami takornariaqarnermik inuussutissarsiutillit suliassaqarnerulerannik kaaviiartitaqarnerulerannillu kinguneqassangatinneqarpoq.

Misissuinerit pigineqartut ilimanarsisippaat angallassinerni Kangerlussuarmit aallaaveqartuni ullunillu 7-inik sivissuseqarajuttuni ilaasup ataatsip nunami 1.733 DKK-it atortarai, imarpimmilu angallassinermi nalinginnaasumi ilaasup ataatsip nunami atortagai 206 DKK-iusut. Umiarsuit takornarianik angallassisartut assigiinngitsut angallassinersa katitigaanerat allanngorartuusinnaavoq. Siunertamut matumunnga tunngatillugu eqqukannersumik agguataarineq imaassinnaavoq, Qeqertarsuup Tunuani sapaatip akunnikkaartumik (taamaakkajunnersumik) angallassinert 75 %-iusut, umiarsuillu angisuut Kujataanut (tassungaannerusoq) ataasiaannartumik nunalittarlutik angallassinert 25 %-iusut.

Angallannerit taamatut katitigaasut aallaavigalugit kaaviiartitassat amerlissutaat agguaqatigiissillugit ilaasumut ataatsimut 1.351,25 DKK-iussapput, taavalu akileraarutikkut isertitassat 135,23 DKK-iusut ilanngullugit, taakku ilaasumut ataatsimut katillugit 1.460,98 DKK-iussapput. Kisitsit 135,23 kr.-i 2013-imi usitussutsimik agguataarilluni agguaqatigiissitsinermik tungaveqarpoq.

Umiarsuarnut takornarianik angallassissutinut ilaallutik takornariat amerlassusiisa amerliartornissaannik mianersortunnguamik naliliineq qulaani pineqartoq takornarianik sullissinermik

inuussutissarsiuqartut, umiarsuarnut takornarianik angallassissutinut ilaallutik takornariati-
gut ima isertitaqaatigissavaat:

Ukioq	Amerlassusii	Isertitassat
2015	21.896	32.547.966
2016	22.496	33.439.854
2017	25.496	37.899.294
2018	28.496	42.358.734
2020	31.496	46.818.174
2030	41.496	61.682.974

Umiarsuit usitussusii (BRT) umiarsualiviillu nunaliffigineqarsimasut qassiuneri naapertorlugit akiliisalernissap umiarsuaatileqatigiiffinnut, aaqqissuussamut maanna atuuttumut sanilliullugu taasarialimmik suliakkersuutaanerulernissaa naatsorsuutigineqanngilaq. Aamma akileraarutip taama annertutigisumik apparneqarnera angallassinerit suulluunniit nunalittarnerisa amerlassusiinut sunniuteqarnerlussangatinneqanngilaq.

Ilaasut angalanernut Danmarkimiit, Savalimmiuniit nunanilluunniit allanit aaqqissuunneqartunut billetsinik pisisimasut akileraarutaannik atorunnaarsitsineq inuussutissarsiuqartut ingerlataqartut allaffissornerannut oqilisaataassangatinneqarpoq.

5. Avatangiisinut, pinngortitamut inuillu peqqissusiannut sunniutissai

Siunnersuutip avatangiisinut sunniuteqarnerlunnissaa naatsorsuutigineqarpoq, tassa umiarsuit takornarianik angallassissutit mingutsitsisullu Kalaallit Nunaanni amerlinerisigut. Umiarsuit takornarianik angallassissutit angisuut amerlanerusut Kalaallit Nunaanni umiarsualivinnut nunalikkumanissaat naatsorsuutigineqarpoq, tamannalu taakkua mingutsitsinerunerannik kinguneqassaaq.

Siunnersuut inuit peqqissusiannut sunniuteqassangatinneqanngilaq.

6. Innuttaasunut sunniutissai

Siunnersuut innuttaasunut allaaffissornikkut sunniuteqartussatut ilimagineqanngilaq.

7. Sunniutissai pingaarutillit allat

Inatsisissatut siunnersuut allanik pingaarutilinnik sunniuteqassangatinneqanngilaq.

8. Oqartussaasunik kattuffinnillu il.il. tusarniaaneq

Siunnersuut piffissami 27. juni 2014-imiit 10. juli 2014-imut ukununnga tusarniaassutigineqarpoq:

KANUKOKA, Kalaallit Nunaanni Sulisitsisut Peqatigiiffiat (GA), NUSUKA, SIK, KNAPK, KPMG Grønland, Deloitte, Grønlands Revisionskontor, BDO, Arctic Umiaq Line A/S aamma Inuussutissarsiornermut Suliffeqarnermullu Naalakkersuisoqarfik.

Aamma siunnersuut kissaateqartoqarneratigut Visit Greenlandimut tusarniaassutigineqarpoq.

Aamma inatsisissatut siunnersuut oqaaseqaatitaalu Tusarniaavimmi tamanut saqqummiunneqarput uani www.naalakkersuisut.gl.

Tusarniaanermi akissuteqarnissamut piffissaliussaq qaangiummat tusarniaanermi akissutisiffigineqarput KANUKOKA, GA, SIK, Arctic Umiaq Line A/S, Inuussutissarsiornermut Suliffeqarnermullu Naalakkersuisoqarfik aamma Visit Greenland.

Oqaaseqaatit tiguneqartut ataani nalinginnaasumik allanneqarput, Naalakkersuisullu oqaaseqaataat *uingasumik* allanneqarlutik.

KANUKOKA-p kommunit sinnerlugit nalunaarutigaa inatsisissatut siunnersuutip tusarniaassutigineqarnera akissuteqarfigineqassanngitsoq, tassami tusarniaaneq taama sivikitsigisumik piffissaqarluni, aammalu tusarniaanermut akissuteqarnissaq julip qaammataanut inissinneqarsimammat tunngavilersorluakkamik akissuteqarfigineqarsinnaanngimmat. KANUKOKA-p kissaatigaa Inatsisartunut ilaasortat ilisimatinneqassasut inatsisissatut siunnersuutip tusarniaassutigineqarnera kommunit akissuteqarfiginngikkaat, Namminersorlutimmi Oqartussat kommunillu julip qaammataata tusarniaaffiusannginnissaanik isumaqatigiissutaat 20. maj 2010-meersoq eqquutsinneqanngimmat.

Umiarsualivimmiinnermut akileraarutit appartinniarneqarnerat GA-p iluarisimaarpaa.

SIK siunnersuummut oqaaseqaatissaqanngilaq, siunnersuutillu tamakkununnga tunngasunik misissuilluni sanilliussinermik tunngavilersugaa iluarisimaarnerarlugu.

Ilaasut angalanernut ataatsimut aqqissuussanut (ilaasunik nalinginnaasunik takornarianillu angallassinernut) billetsunik pisisut akileraarummik akiliisussaanerisa atorunnaarsinneqarnera Arctic Umiaq Line A/S-p nuannaarutigaa.

Visit Greenlandip siunnersuut nuannaarutigaa, umiarsuimmi takornarianik angallassissutit Nunatsinnukarnissamat pilerisaarniarneranni aggerteqquittarniarnerannilu aporfiit anginerpaat ilaat tassaammat akileraarutip qaffasinnerujussua. Inatsimmi atuuttumi § 1, imm. 4-p atuut-siinnarneqarnissaa Visit Greenlandip inassutigaa, umiarsuit ilaasumik amerlassusiannik nalunaaruteqartussaannerat atuutsiinnaqqullugu, taamatummi nalunaaruteqartarnej umiarsuit takornarianik angallassissutit pillugit kisitsisitigut paasissutissanik kisitsisinillu pingaarnernik suli-aqarnissamat tunngaviusarmat taamaattumillu pingaartorujussuummat. Ilaasut tamarmiullutik qassiuneri qanorlu inuiaassuseqarneri nalunaarutigineqartarpata tamanna paasissutissiisarnermut tunngatillugu pitsaasuussagaluartoq umiarsuaatileqatigiiffiit allaffissornerannut pisarsersuutaassagunarpoq, taamaattumillu Naatsorsueqqissaartarfik isumasioqqaarlugu aatsaat pi-umasaqaataasariaqarluni.

§ 1, imm. 4-p atorunnaarsinneqarnissaanik siunnersuut peerneqarpoq. Tassunga taarsiullugu siunnersuummi aalajangersagaq allannqortinneqarpoq, tassani allassimalerluni umiarsuup naalagaata ilaasut qanoq inuiaassuseqarnerat aammattaaq nalunaarutigisassagaa. Taamaaliormi eqqarsaatigineqarpoq paasissutissat tamakku ilaatigut pilerisaarnermut atatillugu pigissallugit soqutiginaateqarsinnaammata. Qanoq inuiaassuseqarnej pillugu paasissutissat nalunaarutigineqartalersinnerisigut suliakkersuutip Namminersorlutik Oqartussat paasissutissanik peqarnissamik soqutigisaannut akerliunissaa Naalakkersuisut naatsorsuutiginnigilaat.

Inuussutissarsiornermut Suliffeqarnermullu Naalakkersuisoqarfiup siunnersuut tamakkiisumik tapersersorpaa. Oqaaseqaatini nalinginnaasuni immikkoortoq 4-mut aaqqiissutissamerngit Naalakkersuisoqarfiup siunnersuutigai.

Aaqqiissutissatut siunnersuutit ilanngunneqarput.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr.- 1-imut

Inatsisip umiarsuarni takornarianik angallassisuni ilaasut akileraarutaannik imaqarunnaarnerata kingunerisaanik inatsisip taaguutaanik allannguinnessaq aalajangersakkami pineqarpoq.

Nr. 2-imut

Siunnersuutaavoq § 1, imm. 2-3 atorunnaarsinneqassasut.

Nr. 3-mut

Siunnersuutaavoq umiarsuup takornarianik angallassissutip Kalaallit Nunaanni umiarsualivimmut, umiarsualiviup avataanut sinerissamiluunniit ilaasuminik nunnigussiffissamisut tikitassaanut siullermut apuunnissaa nal.ak. 24-nik sioqqullugu, umiarsuup naalagaata allattorsimaffik ilaasut qanoq amerlatiginerannik pineqartullu qanoq inuiaassuseqarnerannik imaqartoq Akileraaruseriffimmut nassiuttassagaa. Nalunaaruteqartussaaneq ilaasut qanoq inuiaassuseqarnerannik siunnersuutikkut ilaneqarpoq.

Til nr. 4

Siunnersuutaavoq umiarsuit takornarianik angallassissutit akileraarutaat umiarsualivimmut nunalinnerit tamaasa BRT-imut ataatsimut nal.ak. 24-t aallartinneri tamaasa 1,10 kr.-iusoq atuutilersinneqassasoq.

Taaguummi ”umiarsuaq takornarianik angallassissut”-mi pineqarpoq umiarsuaq ilaasartaat aalajangersimasumik ingerlaarfeqanngitsoq, angalanerminilu ilaasunik umiarsualivimmiit umiarsualivimmut allamut angallassinissamik pingaarnertut siunertaqanngitsoq. Ilaasut ilaannermini siunertaat pingaarneq tassaagajuppoq nuannaariarnissaq qasuersaarnissarlu, soorlutaaq umiarsuarmi takornarianik angallassissuummi ilaasuuneq imminermini tassaagajuttoq takornariatut angalaarnissaq. Umiarsuup ilaasartaatip ilaasunik umiarsualivimmiit umiarsualivimmut allamut angallanneqarnissaminnik siunertaqartunik ilaanneeriarluni ilaasoqartarnera umiarsuup ilaasartaatip takornarianik angallassisutut angalaarneranut allannguutaanngilaq.

Nr. 5-imut

§ 5, imm. 1, oqaaseqatigiit aappaasa pingajuisalu peerneqarnissaat siunnersuutaavoq.

N. 6-imut

§ 5, imm. 3-p atorunnaarnissaa siunnersuutaavoq.

Nr. 7-imut

Siunnersuut oqaaseqatigiit aappaata kinguneranik aaqqiineruvoq.

§ 2-mut

Siunnersuutigineqarpoq inatsit 1. juni 2015-imi atuutilissasoq.